



1735  
87



沈約宋書凡七十七篇總一百卷

帝紀十卷

志三十卷

列傳六十卷


此係八年治  
月諸人  
悼山田  
部君以  
所賜



宋書



皇明崇禎七年歲在闕逢閏茂余月八日琴川毛氏開雕



宋書目錄

帝紀

第一卷

帝紀第一

武帝上

第二卷

帝紀第二

武帝中

第三卷

帝紀第三

武帝下

第四卷

及古明



帝紀第四

少帝

第五卷

帝紀第五

文帝

第六卷

帝紀第六

孝武帝

第七卷

帝紀第七

前廢帝

第八卷

帝紀第八

明帝

第九卷

帝紀第九

後廢帝

第十卷

帝紀第十

順帝

志

第十一卷

志第一

志序

二

三



第十二卷

志第二

曆上

第十三卷

志第三

曆下

第十四卷

志第四

禮一

第十五卷

志第五

禮二

四

第十六卷

志第六

禮三

第十七卷

志第七

禮四

五

第十八卷

志第八

禮五

第十九卷

志第九

樂一



第二十卷

志第十

樂二

第二十一卷

志第十一

樂三

第二十二卷

志第十二

樂四

第二十三卷

志第十三

天文一

六

第二十四卷

志第十四

天文二

第二十五卷

志第十五

天文三

第二十六卷

志第十六

天文四

第二十七卷

志第十七

符瑞上

七



第二十八卷

志第十八

符瑞中

第二十九卷

志第十九

符瑞下

第三十卷

志第二十

五行一

第三十一卷

志第二十一

五行二

第三十二卷

志第二十二

五行三

第三十三卷

志第三十三

五行四

第三十四卷

志第二十四

五行五

第三十五卷

志第二十五

州郡一

九

八



揚州

南兖州

南徐州

兖州

第三十六卷

志第二十六

州郡二

南豫州

豫州

江州

青州

冀州

司州

第三十七卷

志第二十七

州郡三

荊州

郢州

十

湘州

梁州

雍州

秦州

第三十八卷

志第二十八

州郡四

益州

寧州

廣州

交州

越州

第三十九卷

志第二十九

百官上

第四十卷



志第三十

百官下

列傳

第四十一卷

列傳第一

后妃

孝穆趙皇后

武敬臧皇后

少帝司馬皇后

文路淑媛

前廢帝何皇后

明恭王皇后

孝懿蕭皇后

武張夫人

文元表皇后

潘淑妃

孝武文穆王皇后

宣貴妃

文沈婕妤

後廢帝江皇后

十一

順陳太妃

第四十二卷

列傳第二

劉穆之

第四十三卷

列傳第三

徐羨之

檀道濟

第四十四卷

列傳第四

謝晦

第四十五卷

順謝皇后

王弘

傅亮



列傳第五

王鎮惡

向靖

劉粹

第四十六卷

列傳第六

趙倫之

王懿

第四十七卷

列傳第七

劉懷肅

劉敬宣

檀韶

劉懷慎

到彥之  
闕

張劭

孟懷玉  
弟龍符

檀祗

第四十八卷

列傳第八

朱齡石  
弟超石

傅引之

第四十九卷

列傳第九

孫處

劉鍾

第五十卷

列傳第十

胡藩

垣護之

十二

毛修之

蒯恩

虞丘進

劉康祖

張興世



第五十一卷

列傳第十一

宗室

長沙景王道憐

臨川烈武王道規鮑照

營浦侯遵考從子季連

第五十二

列傳第十二

庾悅

王誕

謝景仁弟述

表湛弟豹

褚叔度

第五十三卷

列傳第十三

張茂度子永

庾登之弟炳之

謝方明

江夷

第五十四卷

列傳第十四

孔季恭

羊玄保

沈曇慶

第五十五卷

列傳第十五

臧燾

徐廣

傅隆

第五十六卷

列傳第十六



謝瞻

孔琳之

第五十七卷

列傳第十七

十三

蔡廓

子興宗

第五十八卷

列傳第十八

王惠

謝弘微

王球

第五十九卷

列傳第十九

殷淳

子孚弟冲淡

張暢

何偃

江智淵

第六十卷

列傳第二十

范泰

王准之

王韶之

荀伯子

第六十一卷

列傳第二十一

武三王

廬陵孝獻王義真

江夏文獻王義恭

衡陽文王義季

第六十二卷

列傳第二十二

羊欣

張敷



王微

第六十三卷

列傳第二十三

王華

王曇首

殷景仁

沈演之

第六十四卷

列傳第二十四

鄭鮮之

裴松之

何承天

第六十五卷

列傳第二十五

吉翰

劉道產

杜驥

第六十六卷

列傳第二十六

王敬弘

何尚之

第六十七卷

列傳第二十七

謝靈運

十四

第六十八卷

列傳第二十八

武二王

彭城王義康

南郡王義宣

第六十九卷



列傳第二十九

劉湛

范曄

第七十卷

列傳第三十

袁淑

第七十一卷

列傳第三十一

徐湛之

江湛

王僧綽

第七十二卷

列傳第三十二

文九王

南平穆王鑠

建平宣簡王宏

晉熙王昶

始安王休仁

晉平刺王休祐

鄱陽王休業

臨慶冲王休倩

新野懷王夷父

巴陵哀王休若

第七十三卷

十五

列傳第三十三

顏延之

第七十四卷

列傳第三十四

臧質

魯爽

沈攸之



第七十五卷

列傳第三十五

王僧達

顏竣

第七十六卷

列傳第三十六

朱脩之

宗慤

王玄謨

第七十七卷

列傳第三十七

柳元景

顏師伯

沈慶之

第七十八卷

列傳第三十八

蕭思話

劉延孫

第七十九卷

列傳第三十九

文五王

竟陵王誕

廬江王禕

武昌王渾

海陵王休茂

桂陽王休範

第八十卷

列傳第四十

孝武十四王

豫章王子尚

晉安王子勛



松滋侯子房

臨海王子頊

始平孝敬王子鸞

永嘉王子仁

始安王子真

邵陵王子元

淮南王子孟

晉陵孝王子雲

南海哀王子師

淮陽思王子霄

東平王子嗣

武陵王贊

第八十一卷

列傳第四十一

劉秀之

顧琛

顧覲之

第八十二卷

列傳第四十二

周朗

沈懷文

第八十三卷

列傳第四十三

宗越

吳喜

黃回

第八十四卷

列傳第四十四

鄧琬

袁顗

孔顗

第八十五卷

列傳第四十五

謝莊

王景文

十七



第八十六卷

列傳第四十六

殷孝祖

劉劭

第八十七卷

列傳第四十七

蕭惠開

殷琰

第八十八卷

列傳第四十八

薛安都

沈文秀

崔道固

第八十九卷

列傳第四十九

袁粲

第九十卷

列傳第五十

明四王

邵陵殤王友

隨陽王翊

新興王嵩

始建王禧

第九十一卷

列傳第五十一

孝義

龔穎

劉瑜

郭世道

嚴世期

吳達

潘綜



孫法宗

張進之

余齊民

何子平

第九十二卷

列傳第五十二

良吏

王鎮之

徐豁

阮長之

王歆之

第九十三卷

蔣恭

許昭先

孫棘

杜慧度

陸徽

江秉之

列傳第五十三

隱逸

戴顓

周續之

阮萬齡

劉凝之

翟法賜

宗彧之

郭希林

朱百年

劉睦之

第九十四卷

宗炳

王弘之

孔淳之

龔祈

陶潛

沈道虔

雷次宗

王素

關康之



列傳第五十四

恩倖

戴法興

徐爰

于天寶

姜產之

王道隆

戴明寶

阮佃夫

壽寂之

李道兒

楊運長

十六  
大尾

第九十五卷

列傳第五十五

索虜

第九十六卷

列傳第五十六

鮮卑

吐谷渾

第九十七卷

列傳第五十七

夷蠻

南夷

西南夷

婆皇國

閻婆達國

天竺迦毗黎國

百濟國

荆離州蠻

扶南國

阿羅單國

婆達國

師子國

東夷高句驪國

倭國

豫州蠻

第九十八卷

宋書目錄

七



列傳第五十八

氏胡

胡大沮渠蒙遜

張掖

第九十九卷

列傳第五十九

二凶

元凶劭

始興王濬

第一百卷

列傳第六十

自序

宋書目錄終

藝文志卷之四

宋書卷一

本紀第一

武帝上

藝文志卷之四

高祖武皇帝諱裕字德輿小名寄奴彭城縣綏里人漢高帝弟楚元王交之後也交生紅懿侯富富生宗正辟彊辟彊生陽城繆侯德德生陽城節侯安民安民生陽城釐侯慶忌慶忌生陽城肅侯岑岑生宗正平平生東武城令某某生東萊太守景景生明經洽洽生博士弘弘生瑯邪都尉悝悝生魏定襄太守某某生邪城令亮亮生晉北平太守膺膺生相國掾熙熙生開封令旭孫旭孫生混始過江居晉陵郡丹徒縣之京口里官至武原令混生東安太守靖靖生郡功曹翹是為皇考高祖以晉哀帝興寧元年歲次癸亥三月壬寅夜生及長身長七尺六寸風骨奇特家貧有大志不

古今月



治廉隅事繼母以孝謹稱初爲冠軍孫無終司馬安帝隆安三年十一月妖賊孫恩作亂於會稽晉朝衛將軍謝琰前將軍劉牢之東討牢之請高祖參府軍事十二月牢之至吳而賊緣道屯結牢之命高祖與數十人覘賊遠近會遇賊至衆數千人高祖便進與戰所將人多死而戰意方厲手奮長刀所殺傷甚衆牢之子敬宣疑高祖淹久恐爲賊所困乃輕騎尋之旣而衆騎並至賊乃奔退斬獲千餘人摧鋒而進平山陰恩遁還入海四年五月恩復入會稽殺衛將軍謝琰十一月劉牢之復率衆東征恩退走牢之屯上虞使高祖戍句章城句章城旣卑小戰士不盈數百人高祖常被堅執銳爲士卒先每戰輒摧鋒陷陣賊乃退還浹口于時東伐諸帥御軍無律士卒暴掠甚爲百姓所苦唯高祖法令明整所至莫不親賴焉五年春孫恩頻攻句章高祖屢摧破之恩復走

入海三月恩北出海鹽高祖追而翼之築城于海鹽故治賊日來攻城城內兵力甚弱高祖乃選敢死之士數百人咸脫甲冑執短兵竝鼓噪而出賊震懼奪氣因其懼而奔之竝棄甲散走斬其大帥姚盛雖連戰尅勝然衆寡不敵高祖獨深慮之一夜偃旗匿衆若已遁者明晨開門使羸疾數人登城賊遙問劉諱所在曰夜已走矣賊信之乃率衆大上高祖乘其懈怠奪擊大破之恩知城不可下乃進向滬瀆高祖復棄城追之海鹽令鮑陋遣子嗣之以吳兵一千請爲前驅高祖曰賊兵甚精吳人不習戰若前驅失利必敗我軍可在後爲聲援不從是夜高祖多設伏兵兼置旗鼓然一處不過數人明日賊率衆萬餘迎戰前驅旣交諸伏皆出舉旗鳴鼓賊謂四面有軍乃退嗣之追奔爲賊所沒高祖且戰且退賊盛所領死傷且盡高祖慮不免至向伏兵處乃止令左右脫取死人



衣賊謂當走反停疑猶有伏高祖因呼更戰氣色甚猛賊衆以爲  
然乃引軍去高祖徐歸然後散兵稍集五月孫恩破滬瀆殺吳國  
內史袁山松死者數千人是月高祖復破賊於婁縣六月恩乘勝  
浮海奄至丹徒戰士十餘萬劉牢之猶屯山陰京口震動高祖倍  
道兼行與賊俱至于時衆力旣寡加以步遠疲勞而丹徒守軍莫  
有鬪志恩率衆數萬鼓噪登蒜山居民皆荷檐而立高祖率所領  
奔擊大破之投獻赴水死者甚衆恩以鼓排音敗自載僅得還船雖  
被摧破猶恃其衆力徑向京師樓船高大值風不得進旬日乃至  
白石尋知劉牢之已還朝廷有備遂走向鬱洲八月以高祖爲建  
武將軍下邳太守領水軍追恩至鬱洲復大破恩恩南走十一月  
高祖追恩於滬瀆及海鹽又破之三戰並大獲俘馘以萬數恩自  
是饑饉疾疫死者大半自浹口奔臨海元興元年正月驃騎將軍

司馬元顯西伐荊州刺史桓玄玄亦率荆楚大衆下討元顯元顯  
遣鎮北將軍劉牢之拒之高祖參其軍事次溧洲玄至高祖請擊  
之不許將遣子敬宣詣玄請和高祖與牢之甥東海何無忌竝固  
請不從遂遣敬宣詣玄尅京邑殺元顯以牢之爲會稽內史懼  
而告高祖曰便奪我兵禍其至矣今當北就高雅於廣陵舉事卿  
能從我去乎答曰將軍以勁卒數萬望風降服彼新得志威震天  
下三軍人情都已去矣廣陵豈可得至邪諱當反復還京口耳牢  
之叛走自縊死何無忌謂高祖曰我將何之高祖曰鎮北去必不  
免卿可隨我還京口桓玄必能守節北面我當與卿事之不然與  
卿圖之今方是玄矯情任筭之日必將用我輩也桓玄從兄脩以  
撫軍鎮丹徒以高祖爲中兵參軍軍郡如故孫恩自奔敗之後徒  
旅漸散懼生見獲乃於臨海投水死餘衆推恩妹夫盧循爲主桓



玄欲且緝寧東土以循爲永嘉太守循雖受命而寇暴不已五月  
玄復遣高祖東征時循自臨海入東陽二年正月玄復遣高祖破  
循於東陽循奔永嘉復追破之斬其大帥張士道追討至于晉安  
循浮海南走六月加高祖彭城內史桓玄爲楚王將謀篡盜玄從  
兄衛將軍謙屏人問高祖曰楚王勲德隆重四海歸懷朝廷之情  
咸謂宜有揖讓卿意以爲何如高祖旣志欲圖玄乃遜辭答曰楚  
王宣武之子勲德蓋世晉室微弱民望久移乘運禪代有何不可  
謙喜曰卿謂可爾便當是真可爾十二月桓玄篡帝位遷天子於  
尋陽桓脩入朝高祖從至京邑玄見高祖謂司徒王謐曰昨見劉  
裕風骨不恒蓋人傑也每遊集輒引接殷勤贈賜甚厚高祖愈惡  
之或說玄曰劉諱龍行虎步視瞻不凡恐不爲人下宜蚤爲其所  
玄曰我方欲平蕩中原非劉裕莫可付以大事關隴平定然後當

別議之耳玄乃下詔曰劉諱以寡制衆屢摧妖鋒汎海窮追十殄  
其人諸將力戰多被重創自元帥以下至于將士並宜論賞以叙  
勲烈先是高祖東征盧循何無忌隨至山陰勸於會稽舉義高祖  
以爲玄未據極位且會稽遙遠事濟爲難俟其篡逆事著徐於京  
口圖之不憂不尅至是桓脩還京高祖託以金創疾動不堪步從  
乃與無忌同船共還建興復之計於是與弟道規沛國劉毅平昌  
孟昶任城魏詠之高平檀憑之瑯邪諸葛長民太原王元德隴西  
辛扈興東莞童厚之竝同義謀時桓脩弟弘爲征虜將軍青州刺  
史鎮廣陵道規爲弘中兵參軍昶爲州主簿乃令毅潛往就昶聚  
徒於江北謀起兵殺弘長民爲豫州刺史刁逵左軍府參軍謀據  
歷陽相應元德厚之謀於京邑聚衆攻玄竝尅期齊發三年二月  
巳丑朔乙卯高祖託以遊獵與無忌等收集義徒凡同謀何無忌



魏詠之詠之弟欣之順之檀憑之憑之從子韶弟祗隆與叔道濟道濟從兄範之高祖弟道憐劉毅毅從弟藩孟昶昶族弟懷玉河內向彌管義之陳留周安穆臨淮劉蔚從弟珪之東莞臧喜從弟寶符從子穆生童茂宗陳郡周道民漁陽田演譙國范清等二十七人願從者百餘人丙辰詰旦城開無忌服傳詔服稱詔居前義衆馳入齊聲大呼吏士驚散莫敢動卽斬脩以徇高祖哭甚慟厚加殯斂孟昶勸弘其日出獵未明開門出獵人昶道規毅等率壯士五六十人因開門直入弘方噉粥卽斬之因收衆濟江義軍初尅京城脩司馬刁弘率文武佐吏來赴高祖登城謂之曰郭江州已奉乘輿反正於尋陽我等竝被密詔誅除逆黨同會今日賊玄之首已當梟於大航矣諸君非大晉之臣乎今來欲何爲弘等佐之收衆而退毅旣至高祖命誅弘毅兄邁先在京師事未發數日

高祖遣同謀周安穆報之使爲內應邁外雖酬許內甚震懼安穆見其惶駭慮事必泄乃馳歸時玄以邁爲竟陵太守邁不知所爲便下船欲之郡是夜玄與邁書曰北府人情云何卿近見劉云何所道邁謂玄已知其謀晨起白之玄驚懼封邁爲重安侯旣而廉邁不執安穆使得逃去乃殺之誅元德扈興厚之等召桓謙卞範之等謀拒高祖謙等曰亟遣兵擊之玄曰不然彼兵速銳計出萬死若行遣水軍不足相抗如有蹉跌則彼氣成而吾事敗矣不如屯大衆於覆舟山以待之彼空行二百里無所措手銳氣已挫旣至忽見大軍必驚懼駭愕我案兵堅陣勿與交鋒彼求戰不得自然走散此計之上也謙等固請乃遣頓丘太守吳甫之右衛將軍皇甫敷北拒義軍玄自聞軍起憂懼無復爲計或曰劉諱等衆力甚弱豈辦之有成陛下何慮之甚玄曰劉諱足爲一世之雄劉毅



家無檐石之儲樗蒲一擲百萬何無忌劉牢之甥酷似其舅共舉大事何謂無成衆推高祖爲盟主移檄京邑曰夫治亂相因理不常泰狡焉肆虐或值聖明自我太晉陽九屢構隆安以來難結皇室忠臣碎於虎口貞良弊於豺狼逆臣桓玄陵虐人鬼阻兵荆郢肆暴都邑天未亡難凶力繁興踰年之間遂傾皇祚主上潘越流幸非所神器沉淪七廟毀墜夏后之罹泥塗有漢之遭莽卓方之於玄未足爲喻自玄篡逆于今歷年亢旱彌時民無生氣加以士庶疲於轉輸文武困於造築父子乖離室家分散豈唯大東有杼軸之悲標梅有傾筐之墜而已哉仰觀天文俯察人事此而能久孰有可亡凡在有心想不扼腕諱等所以叩心泣血不遑啟處者也是故夕寐宵興援獎忠烈潛構崎嶇險過履虎輔國將軍劉毅廣武將軍何無忌鎮北主簿孟昶兗州主簿魏詠之寧遠將軍劉

道規龍驤將軍劉藩振威將軍檀憑之等忠烈斷金精貫白日荷戈奮袂志在畢命益州刺史毛璩萬里齊契掃定荆楚江州刺史郭昶之奉迎主上宮于尋陽鎮北參軍王元德等竝率部曲保據石頭揚武將軍諸葛長民收集義士已據歷陽征虜參軍庾曠之等潛相連結以爲內應同力協規所在蜂起卽日斬僞徐州刺史安城王脩青州刺史弘首義衆旣集文武爭先咸謂不有一統則事無以輯諱辭不獲已遂總軍要庶上憑祖宗之靈下罄義夫之力剪馘逋逆蕩清京輦公侯諸君或世樹忠貞或身荷爵寵而並俛眉猾豎自效莫由顧瞻周道寧不弔乎今日之舉良其會也諱以虛薄才非古人勢接於已踐之機受任於旣頽之運丹誠未宣感慨憤躍望霄漢以永懷盼山川以增厲授檄之日神馳賊廷以孟昶爲長史總攝後事檀憑之爲司馬百姓願從者千餘人三月



戊午朔遇吳甫之於江乘甫之玄驍將也其兵甚銳高祖躬執長刀大呼以衝之衆皆披靡卽斬甫之進至羅落橋皇甫數率數千人逆戰寧遠將軍檀憑之與高祖各御一隊憑之戰敗見殺其衆退散高祖進戰彌厲前後奮擊應時摧破卽斬數首初高祖與何無忌等共建大謀有善相者相高祖及無忌等並當大貴其應甚近惟云憑之無相高祖與無忌密相謂曰吾等旣爲同舟理無偏異吾徒咸皆富貴則檀不應獨殊深不解相者之言至是而憑之戰死高祖知其事必捷玄聞敷等並沒愈懼使桓謙屯東陵口卞範之屯覆舟山西衆合二萬己未旦義軍食畢棄其餘糧進至覆舟山東使丐士張旗幟於山上以爲疑兵玄又遣武騎將軍庾祿之配以精卒利器助謙等高祖躬先士卒以奔之將士皆殊死戰無不一當百呼聲動天地時東北風急因命縱火煙焰張天鼓噪

之音震京邑謙等諸軍一時土崩玄始雖遣軍置陣而走意已決別使領軍將軍殷仲文具舟於石頭仍將子姪浮江南走庚申高祖鎮石頭城立留臺官焚桓溫神主於宣陽門外造晉新王立于太廟遣諸將帥追玄尚書王假率百官奉迎乘輿司徒王謐與衆議推高祖領揚州固辭乃以謐爲錄尚書事領揚州刺史於是推高祖爲使持節都督揚徐兗豫青冀幽并八州諸軍事領軍將軍徐州刺史先是朝廷承晉氏亂政百司縱弛桓玄雖欲釐整而衆莫從之高祖以身範物先以威禁內外百官皆肅然奉職二三日間風俗頓改且桓玄雖以雄豪見推而一朝便有極位晉氏四方牧守及在朝大臣盡心伏事臣主之分定矣高祖位微於朝衆無一旅奮臂艸萊之中倡大義以復皇祚由是王謐等諸人時失民望莫不愧而憚焉諸葛長民失期不得發乃達執送之未至而玄



敗玄經尋陽江州刺史郭昶之備乘輿法物資之玄收略得二千餘人挾天子走江陵冠軍將軍劉毅輔國將軍何無忌振武將軍劉道規率諸軍追討尚書左僕射王愉愉子荊州刺史綏等江左寇族綏少有重名以高祖起自布衣甚相凌忽綏桓氏甥亦有自疑之志高祖悉誅之四月奉武陵王遵爲大將軍承制大赦天下唯桓玄一祖後不在赦例初高祖家貧嘗負刀遠社錢三萬經時無以還遠執錄甚嚴王謐造遠見之密以錢代還由是得釋高祖名微位薄盛流皆不與相知唯謐交焉桓玄將篡謐手解安帝璽紱爲玄佐命功臣及義旗建衆竝謂謐宜誅唯高祖保持之劉毅嘗因朝會問謐璽紱所在謐益懼及王愉父子誅謐從弟諶謂謐曰王駒無罪而義旗誅之此是剪除勝已以絕民望兄旣桓氏黨附名位如此欲求免得乎駒愉小字也謐懼奔於曲阿高祖牋白

大將軍深相保謐迎還復位光祿勳丁承之左衛

將軍司馬秀役使官人爲御史中丞王禎之所糾

送司馬秀

憤承之造司宜藏高祖與大將軍牋白粲等備位大臣所懷必盡執憲不允自應據理陳訴而橫興怨忿歸咎有司宜加裁當以清風軌並免官桓玄兒子韶聚衆向歷陽高祖命輔國將軍諸葛長民擊走之無忌道規破玄大將鄭鈐等于桑落洲衆軍進據尋陽加高祖都督江州諸軍事玄旣還荆郢大聚兵衆召水軍造樓船器械率衆二萬挾天子發江陵浮江東下與冠軍將軍劉毅等相遇於崢嶸洲衆驚下擊大破之玄棄衆復挾天子還復江陵玄黨殷仲文奉晉二皇后還京師玄至江陵因西走南郡太守王騰之荆州別駕王康產奉天子入南郡府初征虜將軍益州刺史毛璩遣從孫祐之與參軍費恬送弟喪州下有衆二百璩弟子脩之時



敗玄經尋陽江州刺史郭昶之備乘輿法物資之玄收略得二千餘人挾天子走江陵冠軍將軍劉毅輔國將軍何無忌振武將軍劉道規率諸軍追討尚書左僕射王愉愉子荊州刺史綏等江左寇族綏少有重名以高祖起自布衣甚相凌忽綏桓氏甥亦有自疑之志高祖悉誅之四月奉武陵王遵爲大將軍承制大赦天下唯桓玄一祖後不在赦例初高祖家貧嘗負刀逵社錢三萬經時無以還逵執錄其嚴王謐造逵見之密以錢代還由是得釋高祖名微位薄盛流皆不與相知唯謐交焉桓玄將篡謐手解安帝璽紱爲玄佐命功臣及義旗建衆竝謂謐宜誅唯高祖保持之劉毅嘗因朝會問謐璽紱所在謐益懼及王愉父子誅謐從弟諶謂謐曰王駒無罪而義旗誅之此是剪除勝已以絕民望兄旣桓氏黨附名位如此欲求免得乎駒愉小字也謐懼奔於曲阿高祖賤白

大將軍深相保謐迎還復位光祿勳丁承之左衛將軍褚粲游擊將軍司馬秀役使官人爲御史中丞王禎之所糾察謝賡言辭怨憤承之造司宜藏高祖與大將軍賤白粲等備位大臣所懷必盡執憲不允自應據理陳訴而橫興怨忿歸咎有司宜加裁當以清風軌並免官桓玄兒子韶聚衆向歷陽高祖命輔國將軍諸葛長民擊走之無忌道規破玄大將鄭鈐等于桑落洲衆軍進據尋陽加高祖都督江州諸軍事玄旣還荆郢大聚兵衆召水軍造樓船器械率衆二萬挾天子發江陵浮江東下與冠軍將軍劉毅等相遇於崢嶸洲衆驚下擊大破之玄棄衆復挾天子還復江陵玄黨殷仲文奉晉二皇后還京師玄至江陵因西走南郡太守王騰之荊州別駕王康產奉天子入南郡府初征虜將軍益州刺史毛璩遣從孫祐之與參軍費恬送弟喪州下有衆二百璩弟子脩之時



爲玄屯騎校尉誘玄以入蜀至枚回洲恬與祐之迎射之益州督護馮遷斬玄首傳京師又斬玄子昇於江陵市初玄敗於崢嶸洲義軍以爲大事已定追躡不速玄死我一旬衆軍猶不至玄從子振逃於華容之浦中招聚逆黨數千人晨襲江陵城居民競出赴之騰之康產皆被殺桓謙先匿於沮川亦聚衆以應振爲玄舉哀立喪廷謙率衆官奉璽綬於安帝無忌道規旣至江陵與桓振戰于靈溪玄黨馮該又設伏于楊林義軍奔敗退還尋陽兗州刺史辛禹懷貳會北青州刺史劉該反禹求征該次淮陰又反禹長史羊穆之斬禹傳首京師十月高祖領青州刺史甲仗百人入殿劉毅諸軍復進至夏口毅攻魯城道規攻偃月壘皆拔之十二月諸軍進平巴陵義熙元年正月毅等至江津破桓謙桓振江陵平天子反正二月天子至自江陵詔曰古稱大者天地其次君臣所以

列貫三辰神人代序諒理本於造昧而運周於萬葉故盈否時襲四靈通其變王道或昧貞賢拯其危天命所以永固人心所以攸穆雖夏周中傾賴靡申之績恭倫載竊寔二代是維或乘資藉號或業隆異世猶詩書以之休詠記策用爲美談未有因心撫民而誠發理應援神器於已淪若在今之盛者也朕以寡昧遭家不造越自邁閔屬當屯極逆臣桓玄乘豐縱慝窮凶恣虐滔天猾夏遂誣罔人神肆其篡亂祖宗之基旣湮七廟之饗胥殄若墜淵谷未足斯譬皇度有晉天縱英哲使持節都督揚徐兗豫青冀幽并江九州諸軍事鎮軍將軍徐青二州刺史忠誠天亮神武命世用能貞明協契義夫響臻故順聲一唱二溟卷波英風振路宸居清翳暨寇軍將軍毅輔國將軍無忌振武將軍道規舟旗遙邁而元凶傳首回戈疊揮則荆漢霧廓俾宣元之祚永固於嵩岱傾基重造



再集於朕躬宗廟歆七百之祐皇基融載新之命念功惟德永言  
銘懷固已道冠開闢獨絕終古書契以來未之前聞矣雖則功高  
靡尚理至難文而崇庸命德哲王攸先者將以弘道制治深關盛  
衰故伊望膺殊命之賜桓文饗備物之禮況宏徵不世顧邈百代  
者宜極名器之隆以光大國之盛而領軍謙虛自衷誠旨屢顯朕  
重逆仲父乃所以愈彰德美也鎮軍可進位侍中車騎將軍都督  
中外諸軍事使持節徐青二州刺史如故顯祚大邦啟茲疆宇高  
祖固讓加錄尚書事又不受屢請歸藩天子不許遣百僚敦勸又  
親幸公第高祖惶懼詣闕陳請天子不能奪是月旋鎮丹徒天子  
重遣大使敦勸又不受乃改授都督荆司梁益寧雍涼七州并前  
十六州諸軍事本官如故於是受命解青州加領兗州刺史盧循  
浮海破廣州獲刺史吳隱之卽以循爲廣州刺史以其同黨徐道

覆爲始興相二年三月督交廣二州十月高祖上言曰昔天禍皇  
室巨狡縱篡臣等義惟舊隸豫蒙國恩仰契信順之符俯厲人臣  
之憤雖社稷之靈抑亦事由衆濟其翼獎忠勤之佐文武畢力之  
士數執在已之謙用虧國體之大輒攝衆軍先上同謀起義始平  
京口廣陵二城臣及撫軍將軍毅等二百七十二人并後赴義出  
都緣道大戰所餘一千五百六十六人又輔國將軍長民故給事  
中王元德等十人合一千八百四十八人乞正封賞其西征衆軍  
須論集續上於是尚書奏封唱義謀主鎮軍將軍諱豫章郡公食  
邑萬戶賜絹三萬匹其餘封賞各有差鎮軍府佐吏降故太傅謝  
安府一等十一月天子重申前令加高祖侍中進號車騎將軍開  
府儀同三司固讓詔遣百僚敦勸三年二月高祖還京師將詣廷  
尉天子先詔獄官不得受詣闕陳讓乃見聽旋于丹徒閏月府將



駱冰謀作亂將被執單騎走追斬之誅冰父永嘉太守球球本東陽郡史孫恩之亂起義於常山故見擢用初桓玄之敗以桓沖忠貞署其孫胤至是冰謀以胤爲主與東陽太守殷仲文潛相連結乃誅仲文及仲文二弟凡桓玄餘黨至是皆誅夷天子遣兼太常葛籍授公策曰有扈滔天夷羿乘豐亂節干紀實撓皇極賊臣桓玄怙寵肆逆乃摧傾華霍倒拔嵩岱五獄旣夷六地易所公命世英縱藏器待時因心資敬誓雪國恥慨憤陵夷誠發宵昧旣而歲月屢遷神器已遠忠孝幽寄寔貫三靈爾乃介石勝機宣契畢舉訴蒼天以爲正揮義旅而一驅奔鋒數百勢烈激電百萬不能抗限制路日直植城遂使衝鯨潰流暴鱗奔漢廟勝遠加重氛載滌二儀廓清三光反照事遂永代功高開闢理微稱謂義感朕心若夫道爲身濟猶縻厥爵况乃誠德俱深勳冠天人者乎是用建茲

邦國永祚山河言念載懷匪云足報徃欽哉俾并余一人長弼皇晉流風垂祚暉烈無窮其降承嘉策對敷朕命十二月司徒錄尚書楊州刺史王謐薨四年正月徵公入輔授侍中車騎將軍開府儀同三司楊州刺史錄尚書徐克二州刺史如故表解兗州先是遣冠軍劉敬宣伐蜀賊譙縱無功而返九月以敬宣挫退遜位不許乃降爲中軍將軍開府如故初僞燕主鮮卑慕容德僭號於青州德死兄子超襲位前後屢爲邊患五年二月大掠淮北執陽平太守劉千載濟南太守趙元驅略千餘家三月公抗表北討以丹陽尹孟昶監中軍留府事四月舟師發京都沂淮入泗五月至下邳留船艦輜重步軍進瑯邪所過皆築城留守鮮卑梁父莒城二戍並奔走慕容超聞王師將至其大將公孫五樓說超宜斷據大峴則除粟苗堅壁清野以待之彼僑軍無資求戰不得旬月之



間折棰以笞之耳超不從曰彼遠來疲勞勢不能久但當引令過峴我以鐵騎踐之不憂不破也豈有預芟苗稼先自蹙弱邪初公將行議者以爲賊聞大軍遠出必不敢戰若不斷大峴當堅守廣固刈粟清野以絕三軍之資非唯難以有功將不能自反公曰我揣之熟矣鮮卑貪不及遠計進利尅獲退惜粟苗謂我孤軍遠入不能持久不過進據臨朐退守廣固我一得入峴則人無退心驅必死之衆向懷貳之虜何憂不尅彼不能清野固守爲諸君保之公旣入峴舉手指天曰吾事濟矣六月慕容超遣五樓及廣寧王賀賴盧先據臨朐城旣聞大軍至留羸老守廣固乃悉出臨朐有巨蔑水去城四十里超告五樓曰急往據之晉軍得水則難擊也五樓馳進龍驤將軍孟龍符領騎居前奔往爭之五樓乃退衆軍步進有車四千兩分車爲兩翼方軌徐行車悉張幔御者執稍又

以輕騎爲遊軍軍令嚴肅行伍齊整未及臨朐數里賊鐵騎萬餘前後交至公命兗州刺史劉藩弟并州刺史道憐諮議參軍劉敬宣陶延壽參軍劉懷玉慎仲道索邈等齊力擊之日向晏公遣諮議參軍檀韶直趨臨朐韶率建威將軍向彌參軍胡藩馳往卽日陷城斬其牙旗悉虜超輜重超聞臨朐已拔引衆走公親鼓之賊乃大奔超遁還廣固獲超馬僞輦王璽豹尾等送于京師斬其大將段暉等十餘人其餘斬獲千計明日大軍進廣固卽屠大城超退保小城於是設長圍守之圍高三丈外穿三重壅停江淮轉輸館穀於齊土撫納降附華戎歡悅援才授爵因而任之七月詔加公北青冀二州刺史超大將垣遵弟苗並率衆歸順公方治攻具城上人曰汝不得張綱何能爲也綱者超僞尚書郎其人有巧思會超遣綱稱藩於姚興乞師請救興僞許之而實憚公不敢遣



綱從長安還泰山太守申宣執送之乃升綱於樓上以示城內城內莫不失色於是使綱大治攻具超求救不獲綱反見虜轉憂懼乃請稱藩求割大峴爲界獻馬千疋不聽圍之轉急河北居民荷戈負糧至者日以千數錄事參軍劉穆之有經略才具公以爲謀主動止必諮焉時姚興遣使告公云慕容見與隣好又以窮告急今當遣鐵騎十萬逕據洛陽晉軍若不退者便當遣鐵騎長驅而進公呼興使答曰語汝姚興我定燕之後息甲三年當平關洛今能自送便可速來穆之聞有羌使馳入而公發遣已去以興所言并答具語穆之穆之尤公曰常日事無大小必賜與謀之此宜善詳之云何卒爾便答公所答興言未能威敵正足怒彼耳若燕未可拔羌救奄至不審何以待之公笑曰此是兵機非卿所解故不語耳夫兵貴神速彼若審能遣救必畏我知寧容先遣信命此是

其見我伐燕內已懷懼自張之辭耳九月進公太尉中書監固讓僞徐州刺史段宏奔索虜十月河北歸順張綱治攻具成毅諸奇巧飛樓木幔之屬莫不畢備城上火石弓矢無所用之六年二月丁亥屠廣固超踰城走征虜賊曹喬胥獲之殺其亡命以下納口萬餘馬二千疋送超京師斬于建康市公之北伐也徐道覆仍有闕關之志勸盧循乘虛而出循不從道覆乃至番禺說循曰本任嶺外豈以理極於此正以劉公難以爲敵故也今方領兵堅城之下未有旋日以此思歸死士掩襲何劉之徒如反掌耳不乘此機而保一日之安若平齊之後小息甲養衆不過一二年間必墮書徵君若劉公自率衆至豫章遣銳師過嶺雖復將軍神武恐必不能當也今日之機萬不可失旣尅都邑傾其根本劉公雖還無能爲也循從之乃率衆過嶺是月寇南康廬陵豫章諸郡守皆委任



奔走于時平齊問未至卽馳使徵公公之初尅齊也欲停鎮下邳清盪河洛旣而被徵使至卽日班師鎮南將軍何無忌與徐道覆戰於豫章敗績無忌被害內外震駭朝廷欲奉乘輿北走就公尋知賊定未至人情小安公至下邳以船運輜重自率精銳步歸至山陽聞無忌被害則慮京邑失守乃卷甲兼行與數十人至淮上問行旅以朝廷消息人曰賊尚未至劉公若還便無所憂也公大喜單船過江逕至京口衆乃大安四月癸未公至京師解嚴息甲撫軍將軍劉毅抗表南征公與毅書曰吾往習擊妖賊曉其變態新獲奸利其鋒不可輕宜須裝嚴畢與弟同舉又遣毅從弟藩往止之毅不從舟師二萬發自姑孰循之初下也使道覆向尋陽自寇湘中諸郡荊州刺史道規遣軍至長沙爲循所敗逕至巴陵將向江陵道覆聞毅上馳使報循曰毅兵衆甚盛成敗事係之於此

宜并力摧之若此克捷天下無復事矣根本旣定不憂上面不平也循卽日發巴陵與道覆連旗而下別有八艘艦九枚起四層高十二丈公以南藩覆沒表送章綬詔不聽五月劉毅敗績于桑落洲棄船步走餘衆不得去者皆爲賊所擒初循至尋陽聞公已還不信也旣破毅乃審凱入之間竝相視失色循欲退還尋陽進平江陵據二州以抗朝廷道覆謂宜乘勝徑進固爭之疑議多日乃見從毅敗問至內外洶擾于時北師始遠多創痍疾病京師戰士不盈數千賊旣破江豫二鎮戰士十餘萬舟車百里不絕奔敗還者並聲其雄盛孟昶諸葛長民懼寇漸逼欲擁天子過江公不聽昶固請不止公曰今重鎮外傾強寇內逼人情危駭莫有固志若一旦遷動便自瓦解土崩江北亦豈可得至設令得至不過延日月耳今兵士雖少自足以一戰若其克濟則臣王同休苟厄運必



至我當以死衛社稷橫尸廟門遂其由來以身許國之志不能遠  
竄於艸間求活也我計決矣卿勿復言昶恐其不濟乃爲表曰臣  
諱北討衆並不同唯臣贊諱行計致使強賊乘間社稷危逼臣之  
身也今謹引分以謝天下封表畢乃仰藥而死於是大開賞募投  
身赴義者一同登京城之科發居民治石頭城建牙誠嚴時議者  
謂宜分兵守諸津要公以爲賊衆我寡若分兵屯則測人虛實且  
一處失利則沮三軍之心今聚衆石頭隨宜應赴既令賊無以測  
多少又於衆力不分若徒旅轉集徐更論之耳移屯石頭乃柵淮  
斷查浦既而羣賊大至公策之曰賊若於新亭直進其鋒不可當  
宜且回避勝負之事未可量也若回泊西岸此成擒耳道覆欲自  
新亭白石焚舟而上循多疑少決每欲以萬全爲慮謂道覆曰大  
軍未至孟昶便望風自裁大勢言之自當計日潰亂今決勝負於

一朝旣非必定之道且殺傷士卒不如按兵待之公于時登石頭  
城以望循軍初見引向新亭公顧左右失色旣而回泊蔡洲道覆  
猶欲上循禁之自是衆軍轉集修治越城築查浦藥園廷尉三壘  
皆聚以實衆冠軍將軍劉敬宣屯北郊輔國將軍孟懷玉屯丹陽  
郡西建武將軍王仲德屯越城廣武將軍劉默屯建陽門外使寧  
朔將軍索邈領鮮卑具裝虎班突騎千餘匹皆被練五色自淮北  
至於新亭賊並聚觀咸畏憚之然猶冀京邑及三吳有應之者遣  
十餘艦來拔石頭柵公命神弩射之發輒摧陷循乃止不復攻柵  
設伏兵於南岸使羸老悉乘舟艦向白石公憂其從白石步上乃  
率劉毅諸葛長民北出拒之留參軍徐赤特戍南岸命堅守勿動  
公旣去賊焚查浦步上赤特軍戰敗死沒有百餘人赤特棄餘衆  
單舸濟淮賊遂率數萬屯丹陽郡公率諸軍馳歸衆憂賊過咸謂



公當徑還拒戰公先分軍還石頭衆莫之曉解甲息士洗浴飲食之乃出列陳於南塘以赤特違處分斬之命參軍諸葛叔度朱齡石率勁勇千餘人過淮羣賊數千皆長刀矛鋌精甲耀日奮躍爭進齡石所領多鮮卑善步稍竝結陳以待之賊短兵弗能抗死傷者數百人乃退走會日暮衆亦歸劉毅之敗豫州主簿表與國反叛據歷陽以應賊瑯邪內史魏順之遣將謝寶討斬之興國司馬襲寶順之不救而退公怒斬之順之詠之弟也於是功臣震攝莫敢不用命六月更授公太尉中書監加黃鉞受黃鉞餘固辭以司馬庾悅爲建威將軍江州刺史自東陽出豫章七月庚申羣賊自蔡洲南走還屯尋陽遣輔國將軍王仲德廣川太守劉鍾河間太守蒯恩追之公還東府大治水軍皆大艦重樓高者十餘丈盧循遣其大將荀林寇江陵桓謙先於江陵奔羌又自羌入蜀僞主

譙縱以爲荊州刺史謙及譙道福率軍二萬出寇江陵適與林會相去百餘里荊州刺史道規斬謙于枝江破林于江津追至竹町斬之初循之走也公知其必寇江陵登遣淮陵內史索邈領馬軍步道援荊州又遣建威將軍孫季高率衆三千自海道襲番禺江州刺史庾悅至五畝嶠賊遣千餘人據斷嶠道悅前驅鄱陽太守虞丘進攻破之公治兵大辦十月率兖州刺史劉藩寧朔將軍檀韶等舟師南伐以後將軍劉毅監大尉留守府後事皆委焉是月徐道覆率衆三萬寇江陵荊州刺史道規又大破之斬首萬餘級道覆走還益口初公之遣索邈也邈在道爲賊所斷道覆敗後方達自循東下江陵斷絕京邑之問傳者皆云已沒及邈至方知循走循初自蔡洲南走留其親黨范崇民五千人高艦百餘戍南陵王仲德等聞大軍且至乃進攻之十一月大破崇民軍焚其舟艦



收其散卒循廣州守兵不以海道爲防是月建威將軍孫季高乘海奄至而城池峻整兵猶數千季高焚賊舟艦悉力而上四面攻之卽日屠其城循父以輕舟奔始興季高撫其舊民戮其親黨勒兵謹守初公之遣季高也衆咸以海道艱遠必至爲難且分徹見力二三非要公不從敕季高曰大軍十二月之交必破妖虜卿今時當至廣州傾其巢穴令賊奔走之日無所歸投季高受命而行如期尅捷循方治兵旅舟艦設諸攻備公欲御以長筭乃屯軍雷池賊揚聲不攻雷池當乘流逕下公知其欲戰且慮賊戰敗或於京江入海遣王仲德以水艦二百於吉陽下斷之十二月循道覆率衆數萬方艦而下前後相抗莫見舳艫之際公悉出輕利鬪艦躬提幡鼓命衆軍齊力擊之又上步騎於西岸右軍參軍庾樂生乘艦不進斬而徇之於是衆軍並踊騰爭先軍中多萬鈞神弩所

至莫不摧陷公中流蹙之因風水之勢賊艦悉泊西岸上軍先備火具乃投火焚之烟燭張天賊衆大敗追奔至夜乃歸循等還尋陽初分遣步軍莫不疑怪及燒賊艦衆乃悅服召王仲德請還爲前驅留輔國將軍孟懷玉守雷池循聞大軍上欲走向豫章乃悉力柵斷左里大軍至左里將戰公所執麾竿折折幡沉水衆並怪懼公歡笑曰往年覆舟之戰幡竿亦折今者復然賊必破矣卽攻柵而進循兵雖殊死戰弗能禁諸軍乘勝奔之循單舸走所殺及投水死凡萬餘人納其降附宥其逼略遣劉藩孟懷玉輕軍追之循收散卒尚有數千人逕還廣州道覆還係始興公旋自左里天子遣侍中黃門勞師於行所



皇朝同治

宋書卷二

本紀第二

皇朝同治

武帝中

七年正月己未振旅于京師改授大將軍揚州牧給班劍二十人  
 本官悉如故固辭免南北征伐戰亡者並列上賻贈尸喪未度遣  
 主帥迎接致還本土二月盧循至番禺為孫季高所破收餘眾南  
 走劉藩孟懷玉斬徐道覆于始興晉自中興以來治綱大弛權門  
 并兼彊弱相凌百姓流離不得保其產業桓玄頗欲釐改竟不能  
 行公既作輔大示軌則豪彊肅然遠近知禁至是會稽餘姚虞亮  
 復藏匿亡命千餘人公誅亮免會稽內史司馬休之天子又申前  
 命公固辭於是改授太尉中書監乃受命奉送黃鉞解冀州交州  
 刺史杜慧度斬盧循傳首京師先是諸州郡所遣秀才孝廉多非



其人公表天子申明舊制依舊策試征西將軍荊州刺史道規疾  
患求歸八年四月改授豫州刺史以後將軍豫州刺史劉毅代之  
毅與公俱舉大義興復晉室自謂京城廣陵功業足以相抗雖權  
事推公而心不服也毅既有雄才大志厚自矜許朝士素望者多  
歸之與尚書僕射謝混丹陽尹郗僧施並深相結及西鎮江陵豫  
州舊府多割以自隨請僧施爲南蠻校尉既知毅不能居下終爲  
異端密圖之毅至西稱疾篤表求從弟兖州刺史藩以爲副貳僞  
許焉九月藩入朝公命收藩及謝混並於獄賜死自表討毅又假  
黃鉞率諸軍西征以前鎮軍將軍司馬休之爲平西將軍荊州刺  
史兖州刺史道憐鎮丹徒豫州刺史諸葛長民監太尉留府事加  
太尉司馬丹陽尹劉穆之建威將軍配以實力壬午發自京師遣  
參軍王鎮惡龍驤將軍蒯恩前襲江陵十月鎮惡尅江陵毅及黨

與皆伏誅十一月己卯公至江陵下書曰夫去弊拯民必存簡恕  
捨網修綱雖煩易理江荆彫殘刑政多闕頃年事故綏撫未週遂  
令百姓疲匱歲月滋甚財傷役困慮不幸生凋殘之餘而不減舊  
刻剝徵求不循政道宰莅之司或非良幹未能菲躬儉苟求盈給  
積習生常漸不知改近因戎役來涉二州踐境親民愈見其瘼思  
欲振其所急卹其所苦凡租稅調役悉宜以見戶爲正州郡縣屯  
田池塞諸非軍國所資利入守宰者今一切除之州郡縣吏皆依  
尚書定制實戶置臺調癸卯梓材庚子皮毛可悉停省別量所出  
巴陵均折度支依舊兵運原五歲刑已下凡所質錄賊家餘口亦  
悉原放以荊州十郡爲湘州公乃進督以西陽太守朱齡石爲益  
州刺史率衆伐蜀進公太傅揚州牧加羽葆鼓吹班劍二十人九  
年二月乙丑公至自江陵初諸葛長民貪淫驕橫爲士民所患苦



公以其同大義優容之劉毅既誅長民謂所親曰昔年醢彭越今年誅韓信禍其至矣將謀作亂公克期至京邑而每淹留不進公卿以下頻日奉候於新亭長民亦驟出既而公輕舟密至已還東府矣長民到門引前卻人閑語凡平生於長民所不盡者皆與及之長民甚悅已密命左右壯士丁旡等自幔後出於坐拉焉長民墜牀又於地毆之死於牀側輿尸付廷尉并誅其弟黎民旡驍勇有氣力時人爲之語曰勿跋扈付丁旡先是山湖川澤皆爲豪強所專小民薪採漁釣皆責稅直至是禁斷之時民居未一公表曰臣聞先王制治九土攸序分境畫疆各安其居在昔盛世人無遷業故井田之制三代以隆秦革斯政漢遂不改富彊兼并於是爲弊然九服弗擾所託成舊在漢西京大遷田景之族以實關中卽以三輔爲鄉閭不復係之於齊楚自永嘉播越爰託淮海朝有匡

復之筭民有思本之心經略之圖日不暇給是以寧民綏治猶有未遑及至大司馬桓温以民無定本傷治爲深庚戌土斷以一其業于時財阜國豐實由於此自茲迄今彌歷年載畫一之制漸用積弛雜居流寓閭伍弗脩王化所以未純民瘼所以猶在臣荷重任恥責實深自非改調解張無以濟治夫人情滯常難與慮始所謂父母之邦以爲桑梓者誠以生焉終焉敬愛所託耳今所居累世墳壟成行敬恭之誠豈不與事而至請準庚戌土斷之科庶子本所弘稍與事著然後率之以仁義鼓之以威武超大江而跨黃河撫九州而復舊土則戀本之志乃速由於當年在始暫勤要終所以能易伏惟陛下垂矜萬民憐其所失永懷鴻雁之詩思隆中興之業旣委臣以國重期臣以寧濟若所啟合允請付外施行於是依界土斷惟徐兗青三州居晉陵者不在斷例諸流寓郡縣多



被併省以公領鎮西將軍豫州刺史公固讓太傅州牧及班劔奉  
還黃鉞七月朱齡石平蜀斬僞蜀王譙縱傳首京師九月封公次  
子義真爲桂陽縣公以賞平齊及定盧循也天子重申前命授公  
太傅揚州牧加羽葆鼓吹班劔二十人將吏百餘敦勸乃受羽葆  
鼓吹班劔餘固辭十年息民簡役築東府起府舍平西將軍荊州  
刺史司馬休之宗室之重又得江漢人心公疑其有異志而休之  
兄子譙王文思在京師招集輕俠公執文思送還休之令自爲其  
所休之表廢文思并與公書陳謝十一年正月公收休之子文寶  
兄子文祖竝於獄賜死率衆軍西討復加黃鉞領荊州刺史辛巳  
發京師以中軍將軍道憐監留府事休之上表自陳曰臣聞運不  
常一泊亂代有陽九旣謝圯中則泰昔篡臣肆逆皇綱絕紐十世  
未改鼎祚再隆太尉臣諱威武明斷首建義旗除蕩元凶皇居反

正布衣匹夫匡復社稷南剿盧循北定廣固千載以來功無與等  
由是四海歸美朝野推崇旣位竊台牧權傾人主不能以道處功  
恃寵驕益自以酬賞旣極便情在無上刑戮逆濫政用暴苛問鼎  
之迹日彰人臣之禮頓缺陛下四時膳御觸事縣空宮省供奉十  
不在皇后寢疾之際湯藥不周手與家書多所求告皆是朝士共  
所聞見莫不傷懷憤歎口不敢言前揚州刺史元顯第五息法興  
桓玄之豐逃遠於外王路旣開始得歸本太傅之胤絕而復興凡  
在有懷誰不感慶諱吞噬之心不避輕重以法興聰敏明慧必爲  
民望所歸芳蘭旣茂內懷憎惡乃妄扇異言無罪卽戮大司馬臣  
德文及王妃公主情計切逼竝狼狽請命逆肆禍毒誓不矜許寃  
酷之痛感動行路自以地卑位重荷恩崇大乃以庶孽與德文嫡  
婚致茲非偶寔由威逼故衛將軍劉毅右將軍劉藩前將軍諸葛



長民尚書僕射謝混南蠻校尉郗僧施或盛勲德胤令望在身皆社稷輔弼協讚所寄無罪無辜一旦夷滅猜忍之性終古所希臣自惟門戶衰破賴之獲存皇家所重終古難匹是以公私歸馮事盡祇順再授荊州輒苦陳告自以才弱位隆不宜久荷分陝屢求解任必不見聽前經攜侍老母牛家俱西凡諸子姪悉留京輦臣兄子譙王文思雖年少常人粗免咎悔性好交遊未知防遠羣醜交構爲其風聲諱遂剪戮人士遠送文思臣順其此旨表送章節請廢文思改襲大宗遺息文寶送女東歸自謂推誠奉順理不過此豈意諱包藏禍心遂見討伐加惡文思構生罪疊羣小之言遠近噂噐而臣純愚闇信必謂不然尋臣府司馬張茂度狼狽東歸南平太守檀範之復以此月三日委郡叛逆尋有審問東軍已上諱今此舉非有怨憎正以臣王室之幹位居藩岳時賢旣盡唯臣獨存規以剪滅成其篡殺鎮北將軍臣宗之青州刺史臣敬宣並是諱所深忌憚欲以次除蕩然後傾移天日於事可易今荆雍義徒不召而集子來之衆其會如林豈臣無德所能綏致蓋七廟之靈理貫幽顯輒授文思振武將軍南郡太守宗之子竟陵太守魯軌進號輔國將軍臣今與宗之親御大衆出據江津案甲抗威隨宜應赴今絳旗所指唯諱兄弟父子而已須尅蕩寇逆尋續馳聞由臣輕弱致諱凌橫上慚俯愧無以厝顏休之府錄事參軍韓延之故吏也有幹用才能公未至江陵密使與之書曰文思事源遠迨所知去秋遣康之送還司馬軍者推至公之極也而了不遜愧又無表疏文思經正不反此是天地之不容吾受命西討止其父子而已彼土僑舊爲所驅逼一無所問往年郗僧施謝邵任集之等交構積歲專爲劉毅謀主所以至此卿等諸人一時逼迫本無



織纍吾處懷期物自有由來今在近路正是諸人歸身之日若大軍登道交鋒接刃蘭艾吾誠不分故具示意并示同懷諸人延之報曰承親率戎馬遠履西畿闔境士庶莫不惶駭何者莫知師出之名故也今辱來疏始知以譙王前事良增歎息司馬平西體國忠貞款愛待物當於古人中求耳以君公有匡復之勲家國蒙賴推德委誠每事詢仰譙王徃以微事見効猶自表遜位況以大過而當嘿然邪但康之前言有所不盡故重使胡道諮白所懷道未及反已奏表廢之所不盡者命耳推寄相與之懷正當如此有何不可便興兵戈自義旗秉權以來四方方伯誰敢不先相諮疇而逕表天子邪譙王爲宰相所責文表廢之經正何歸表使何因可謂欲加之罪其無辭乎劉諱足下海內之人誰不見足下此心而復欲欺誑國士天地所不容在彼不在此矣來示言處懷期物自

有由來今伐人之君陷人以利真可謂處懷期物自有由來者矣劉藩死於閭闔之內諸葛斃於左右之手甘言詫方伯襲之以輕兵遂使席上靡款懷之士閭外無自信諸侯以是爲得筭良可恥也貴府將佐及朝廷賢德寄性命以過日心企太平久矣吾誠鄙劣嘗聞道於君子以平西之至德寧可無授命之臣乎未能自投虎口比迹郝任之徒明矣假今天長喪亂九流渾濁當與臧洪遊於地下不復多言公視書歎息以示諸佐曰事人當如此三月軍次江陵初雍州刺史魯宗之常慮不爲公所容與休之相結至是率其子竟陵太守軌會于江陵江夏太守劉虔之邀之軍敗見殺公命彭城内史徐達之參軍王允之出江夏口復爲軌所敗竝沒時公軍泊馬頭卽日率衆軍濟江躬督諸將登岸莫不奮踊爭先休之衆潰與軌等奔襄陽江陵平加領南蠻校尉將拜值四廢日



佐吏鄭鮮之褚叔度王弘傅亮白遷日不許下書曰此州積弊事故相仍民疲田蕪杼軸空匱加以舊章乖昧事役頻苦童耄奪養老穉服戎空戶從役或越紼應召每永懷民瘼宵分忘寢誠宜蠲除苛政弘茲簡惠庶令凋風弊政與事而新寧一之化成於朞月荆雖二州西局蠻府吏及軍人年十二以還六十以上及扶養孤幼單丁大艱悉仰遣之窮獨不能存者給其長賑府州久勤將吏依勞銓序并除今年租稅四月公復率衆進討至襄陽休之奔羌天子復重申前命授太傅揚州牧劍履上殿入朝不趨贊拜不名加前部羽葆鼓吹置左右長史司馬從事中郎四人封公第三子義隆爲北彭城縣公以中軍將軍道憐爲荊州刺史八月甲子公至自江陵奉還黃鉞固辭太傅州牧前部羽葆鼓吹其餘受命朝議以公道尊勲重不宜復施敬護軍旣加殊禮奏事不復稱名以

世子爲兗州刺史十二年正月詔公依舊辟士加領平北將軍兗州刺史增都督南秦凡二十二州公以平北文武寡少不宜別置於是罷平北府以併大府以世子爲豫州刺史三月加公中外大都督初公平齊仍有定關洛之意值盧循侵逼故其事不諧荆雖旣平方謀外略會羌主姚興死子泓立兄弟相殺關中擾亂公乃戒嚴北討加領征西將軍司豫二州刺史以世子爲徐兗二州刺史下書曰吾倡大義首自本州克復皇祚遂建勳烈外夷勅敵內清奸軌皆邦人州黨竭誠盡力之效也情若風霜義貫金石今當奉辭西旆有事關河弱嗣叨蒙復忝今授情事纏綿可謂深矣項軍國務殷刑辟未息眷言懷之能不多歎其犯臯繫五歲以還可一原遣文武勞滿未蒙榮轉者便隨班序報公受中外都督及司州竝辭大司馬瑯邪王禮敬朝議從之公欲以義聲懷遠奉瑯邪



王北伐五月羌僞黃門侍郎尹冲率兄弟歸順又加公北雍州刺史前部羽葆鼓吹增班劔爲四十人解中書監八月丁巳率大衆發京師以世子爲中軍將軍監太尉留府事尚書右僕射劉穆之爲左僕射領監軍中軍二府軍司入居東府總攝內外九月公次于彭城加領徐州刺史先是遣冠軍將軍檀道濟龍驤將軍王鎮惡步向許洛羌緣道屯守皆望風降服僞兗州刺史韋華先據倉垣亦率衆歸順公又遣北兗州刺史王仲德先以水軍入河仲德破索虜於東郡涼城進平滑臺十月衆軍至洛陽圍金墉泓弟僞平南將軍洸請降送於京師修復晉五陵置守衛天子詔曰夫嵩岱配極則乾道增輝藩嶽作屏則帝王成務是以夏殷資昆彭之伯有周倚齊晉之輔鑒諸前典儀形萬代翼治扶危靡不由此太尉公命世天縱齊聖廣淵明燭四方道光宇宙爰自缺 初迪則

投勤王國妖蜚孔熾則功存社稷固以四維是荷萬邦攸賴者矣暨桓玄僭逆傾蕩四海公深秉大節靈武霆震弘濟朕躬再造王室每惟勲德銘于厥心遂北清海岱南夷百越荆雍稽服庸岷順軌尅黜方難式遏寇虐及阿衡王猷班序內外仰興絕風傍嗣逸業秉禮以整俗遵王以垂訓聲教遠被無思不洽爰暨木居海處之首被髮彫題之長莫不忘其陋險九譯來庭此蓋播諸徽策靡究其詳者也曩者永嘉不綱諸夏幅裂終古帝居淪胥戎虜永言園陵率土同慕公明發遐慨撫機電征親董侯伯稜威致討旗旛首塗則八表響震偏師先路則多壘雲徹舊都載清五陵復禮百城屈膝千落影從自篇籍所載生民以來勲德懋功未有若此之盛者也昔周呂佐獻聖之主因三分之形把旄仗鉞一時指麾皆大啟疆宇跨州兼國其在桓文方茲尤儉然亦顯被寵章光錫殊



品況乃獨絕百代顧邈前烈者哉朕每弘鑒古訓思遵令圖以公深秉冲挹用闕大禮天人引領于茲歷代況今禹迹齊軌九隩同文司勳抗策普天增佇遂公高挹大愆國章三靈眷屬朕實祇懼便宜顯答羣望允崇盛典其進位相國總百揆揚州牧封十郡爲宋公備九錫之禮加璽綬遠遊寇位在諸侯王上加相國綠綬綬策曰朕以寡昧仰續洪基夷羿乘豐蕩覆王室越在南鄙遷于九江宗祀絕饗人神無位提挈羣凶寄命江許則我祖宗之業奄墜于地七百之祚剪焉旣傾若涉淵海罔知攸濟天未絕晉誕育英輔振厥弛維再造區物興亡繼絕俾昏作明元勳至德朕實賴焉今將授公典策其敬聽朕命乃者桓玄肆僭滔天泯夏拔本塞源顛倒六位庶僚俛眉四方莫卹公精貫朝日氣凌霄漢奮其靈武大穢羣慝尅復皇邑奉帝歆神此公之節始于勤王者也授律羣

后泝流長驚薄伐崢嶸獻捷南郢大愆折首羣逆畢夷三光旋采舊物反正此又公之功也出藩入輔弘茲保弼阜財利用繁殖生民編戶歲滋壇宇日啟導德明刑四境有截此又公之功也鮮卑負衆僭盜三齊狼噬冀青虔劉泝岱介恃遐阻仍爲邊毒公蒐乘秣駟夔入遠壘衝櫓四臨萬維俱潰竊號之虜顯戮司寇拓土三千申威龍漠此又公之功也盧循妖凶伺隙五嶺乘虛肆逆侵覆江豫旄拂寰內矢及王城朝野喪沮莫有固志家獻徒卜之計國議遷都之規公乘轅南濟義形于色嶷然內湛視嶮若夷攄略運奇英謨不世狡寇窮衄喪旗宵遁俾我畿甸拯於將墜此又公之功也追奔逐北揚旂江濱偏旅浮海指日遯至番禺之功俘級萬數左里之捷魚潰烏散元凶遠迸傳首萬里海南肅清荒服來款此又公之功也劉毅叛換負豐西夏凌上罔王志肆奸暴附麗協



黨扇蕩王畿公御軌以刑消之不日倉兕電泝神兵風掃罪人斯  
得荆衡清宴此又公之功也譙縱怙亂寇竊一隅王化俱闕三巴  
淪溺公指命偏師授以良圖凌波浮湍致屈井絡潛豎伏鑽梁岷  
革偃此又公之功也馬休魯宗阻兵內侮驅率二方連旗稱亂公  
投袂星言研其上略江津之師勢踰風電迴旆沔川寔繁震懾二  
叛奔迸荆雍來蘇玄澤浸育溫風潛被此又公之功也永嘉不競  
四夷擅華五都幅裂山陵幽辱祖宗懷沒世之憤遺氓有匪風之  
思公遠齊伊宰納隍之仁近同小白滅亡之恥鞠旅陳師赫然大  
號分命羣帥北徇司克許鄭風靡輦洛載清僞牧逆藩交臂請罪  
百年榛穢一朝掃濟此又公之功也公有康宇內之勲重之以明  
德爰初發迹則竒謨冠古電擊彊妖則鋒無前對聿寧東畿大造  
黔首若乃艸昧經綸化融於歲計扶危靜亂道固於苞桑辯方正

位納之軌度蠲削煩苛較若畫一淳風美化盈塞宇宙是以絕域  
獻琛遐夷納貢王略所宣九服率從雖文命之東漸西被咎繇之  
邁于種德何以尚茲朕聞先王之宰世也庸勲尊賢建侯胙土褒  
以寵章崇其徽物所以協輔皇家永隆藩屏故曲阜光啟遂荒徐  
宅營丘表海四履有聞其在襄王亦賴匡霸又命晉文備物光錫  
惟公道冠前烈勲高振古而殊典未加朕甚惜焉今進授相國以  
徐州之彭城沛蘭陵下邳淮陽山陽廣陵兗州之高平魯泰山十  
郡封公爲宋公錫茲玄土苴以白茅爰定爾居用建冢社昔晉鄭  
啟藩入作卿士周邵保傅出總二南內外之重公實兼之命使持  
節太尉尚書左僕射晉寧縣五等男湛授相國印綬宋公璽紱使  
持節兼司空散騎常侍尚書陽遂鄉侯泰授宋公茅土金虎符第  
一至第十左竹使符第一至第十左相國位並不總禮絕朝班居



常之名宜與事革其相國總百揆去錄尚書之號上送所假節侍  
中中外都督太傅太尉印綬豫章公印策進揚州牧領征西將軍  
司豫北徐雍四州刺史如故公紀綱禮度萬國是式秉介蹈方罔  
有遷志是以錫公大輅戎輅各一玄牡二駟公抑末敦本務農重  
積采蘩寔殷稼穡惟阜是用錫公袞冕之服赤舄副焉公閑邪納  
正移風改俗陶鈞器物如樂之和是用錫公軒縣之樂六佾之舞  
公宣美王化導揚休風華夷企踵遠人胥萃是用錫公朱戶以居  
公官方任能網羅幽滯九臯辭野髦士盈朝是用錫公納陛以登  
公當軸處中率下以義式遏寇讎清除苛慝是用錫公虎賁之士  
三百人公明罰恤刑庶獄詳允放命于紀罔有攸縱是用錫公鈇  
鉞各一公龍驤鳳矯咫尺八紘括囊四海折衝無外是用錫公彤  
弓一彤矢百盧弓十盧矢千公溫恭孝思致虔禋祀忠肅之志儀

刑萬方是用錫公柅鬯一貞圭瓚副焉宋國置丞相以下一遵舊  
儀欽哉其祗服往命茂對天休簡恤庶邦敬敷顯德以終我高祖  
之嘉命置宋國侍中黃門侍郎尚書左丞郎隨大使奉迎枹罕虜  
乞佛熾繁遣使詣公求效力討羌拜西平將軍河南公十三年正  
月公以舟師進討留彭城公義隆鎮彭城軍次留城經張良廟令  
曰夫盛德不泯義在祀典微管之歎撫事彌深張子房道亞黃中  
照隣殆庶風雲言感蔚爲帝師大拯橫流夷項定漢固以參軌伊  
望冠德如仁若乃神交圯上道契商洛顯晦之間窈然難究源流  
淵浩莫測其端矣塗次舊沛佇駕留城靈廟荒殘遺像陳昧撫迹  
懷人慨然永歎過大梁者或佇想於夷門遊九原者亦流連於隨  
會可改構榱桶修飾丹青蘋蘩行潦以時致薦以紓懷古之情用  
存不刊之烈天子追贈公祖爲太常父爲左光祿大夫讓不受二



月冠軍將軍檀道濟等次潼關三月庚辰大軍入河索虜步騎十萬營據河津公命諸軍濟河擊破之公至洛陽七月至陝城龍驤將軍王鎮惡伐木爲舟自河浮渭八月扶風太守沈田子大破姚泓於藍田王鎮惡尅長安生擒泓九月公至長安長安豐稔帑藏盈積公先收其彝器渾儀士圭之屬獻于京師其餘珍寶珠玉以班賜將帥執送姚泓斬于建康市謁漢高帝陵大會文武於未央殿十月天子詔曰朕聞先王之莅天下也上則大寶以尊德下則建侯以褒功是以成勳告就文命有玄圭之錫四海來王姬且饗龜蒙之封夫翼聖宣績輔德弘猷禮窮元賞寵章希世況明保冲昧獨運陶鈞者哉朕以不德遭家多難雲雷作屯夷羿竊命失位京邑遂播蠻荆艱難卑約制命凶醜相國宋公天縱睿聖命世應期誠貫三靈大節宏發拯朕窮於巢幕迴靈命於已崩固已道窮

北面暉格八表者矣及外積全國之勲內累戡黎之伐芟夷彊妖之始蘊崇奸猾之源顯仁藏用之道六府孔修之績莫不雲行雨施能事必舉諒已方軌於三五不容於典策者焉自永嘉喪師綿踰十紀五都分崩然正朔時暨唯三秦懸隔之誓賓至今羌虜襲亂淫名三世資百二之易守恃函谷之可關廟筭韜略不謀之日久矣公命世撫運闡曜威靈內研諸侯之慮外致上天之罰故能倉兕甫訓則許鄭風偃鉦鉞未指則灑洛霧披俾舊闕之陽復集萬國之軫東京父老重覩司隸之章俾朕負扈高拱而保大洪烈是用遠鑒前典延卽羣謀敬授殊錫光啟壇宇乘馬之制有陋舊章徽稱之美未窮上爵豈足以顯報懋功允塞民望藩輔王畿長轡六合者乎寔以公每秉謙德卑不可踰難進之道以寵爲戚是故降損盛制且有後命也自茲迄今洪勳彌劭稜威九河魏趙



底服迴轅嶠潼連城水泮遂長驅灞澹懸旂龍門逆虜姚泓係頸  
就擒百稔梗穢滌於崇朝祖宗遺憤雪於一旦涉禹之迹方行天  
下至於海外罔有不服功固萬世其寧惟永豈金石雅頌所能讚  
揚寔可以告於神明勒銘嵩岱者已朕又聞之周道方遠則鸞鷲  
鳴岐二南播德則麟騶呈瑞自公大號初發爰暨告成靈祥炳煥  
不可勝紀豈伊素雉遠至嘉禾近歸而已哉朕每仰鑒玄應俯察  
人謀進惟道勳退惟國典豈得遂公冲挹而久蘊盛策便宜敬行  
大禮允副幽顯之望其進宋公爵爲王以徐州之海陵東安北瑯  
邪北東莞北東海北譙北梁豫州之汝南北潁川北南頓凡十郡  
益宋國其相國揚州牧領征西將軍司豫北徐雍四州刺史如故  
十一月前將軍劉穆之卒以司馬徐羨之代掌留任大事皆所決  
於穆之者皆悉以諮公欲息駕長安經略趙魏會穆之卒乃歸十

二月庚子發自長安以桂陽公義真爲安西將軍雍州刺史留腹  
心將佐以輔之閏月公自洛入河開汴渠以歸十四年正月壬戌  
公至彭城解嚴息甲以輔國將軍劉遵考爲并州刺史領河東太  
守鎮蒲坂公解司州領徐冀二州刺史固讓進爵六月受相國宋  
公九錫之命令曰孤以寡薄負荷殊重守位奉藩危溢是懼朝恩  
隆泰委美推功遂方軌齊晉擬議國典雖亮誠守分十稔于今而  
成命弗迴百辟胥暨內外庶僚敦免周至籍運來之功參休明之  
迹乘菲薄之資同盛德之事監寐永言未知攸託隆祚之始思覃  
斯慶其赦國內殊死以下今月二十三日昧爽以前悉皆原宥鰥  
寡孤獨不能自存者人賜粟五斛府州刑罪亦同蕩然其餘詳依  
舊準詔崇豫章公大夫夫人爲宋公太妃世子爲中軍將軍副貳相  
國府以太尉軍諮祭酒孔季恭爲宋國尚書令青州刺史檀祗爲



領軍將軍相國左長史王弘爲尚書僕射其餘百官悉依天朝之制又詔宋國所封十郡之外悉得除用先是安西中兵參軍沈田子殺安西司馬王鎮惡諸將軍復殺安西長史王修關中亂十月公遣右將軍朱齡石代安西將軍桂陽公義真爲雍州刺史義真既還爲佛佛虜所追大敗僅以身免諸將帥及齡石竝沒領軍檀祇卒以中軍司馬檀道濟爲中領軍十二月天子崩大司馬瑯邪王卽帝位

元熙元年正月詔遣大使徵公入輔又申前命進公爵爲王以徐州之海陵東海北譙北梁豫州之新蔡兗州之北陳留司州之陳郡汝南潁川滎陽十郡增宋國七月乃受命赦國內五歲刑以下遷都壽陽以尚書劉懷慎爲北徐州刺史鎮彭城九月解楊州十二月天子命王冕十有二旒建天子旌旗出警入蹕乘金根車駕六

馬備五時副車置旄頭雲罕樂舞八佾設鐘簾宮縣進王太妃爲太后王妃爲王后世子爲太子王子王孫爵命之號一如舊儀二年四月徵王入輔六月至京師晉帝禪位于王詔曰夫天造艸昧樹之司牧所以陶鈞三極統天施化故大道之行選賢與能隆替無常期禪代非一族貫之百王由來尚矣晉道陵遲仍世多故爰暨元興禍難旣積至三元質位寇履易所安皇播越宗祀墮泯則我宣元之祚永墜于地顧瞻區域剪焉已傾相國宋王天縱聖德靈武秀世一匡頽運再造區夏固以興滅繼絕舟航淪溺矣若夫仰在璿璣旁穆七政薄伐不庭開復壇宇遂乃三俘僞主開滌五都雕顏卉服之鄉龍荒朔漠之長莫不迴首朝陽沐浴玄澤故四靈效瑞川岳啟圖嘉祥雜遝休應炳著玄象表革命之期華裔注樂推之願代德之符著乎幽顯瞻烏爰止允集明哲夫豈延康



有歸咸熙告謝而已哉昔火德既微魏祖底績黃運不競三后肆勤故天之曆數寔有攸在朕雖庸闇昧於大道永鑒廢興爲日已久念四代之高義稽天人之至望予其遜位別宮歸禪于宋一依唐虞漢魏故事詔艸旣成送呈天子使書之天子卽便操筆謂左右曰桓玄之時天命已改重爲劉公所延將二十載今日之事本所甘心甲子策曰咨爾宋王夫玄古權輿悠哉邈矣其詳靡得而聞爰自書契降逮三五莫不以上聖君四海止戈定大業然則帝王者宰物之通器君道者天下之至公昔在上葉深鑒茲道是以天祿旣終唐虞弗得傳其嗣符命來格舜禹不獲全其謙所以經緯三才澄序彙化作範振古垂風萬葉莫尚於茲自是厥後歷代彌劭漢旣嗣德於放勛魏亦方軌於重華諒以協謀乎人鬼而以百姓爲心者也昔我祖宗欽明辰居其極而明晦代序盈虧有期

剪商兆禍非唯一世曾是弗尅矧伊在今天之所廢有自來矣唯王體上聖之姿苞二儀之德明齊日月道合四時乃者社稷傾覆王拯而存之中原蕪梗又濟而復之自負固不賓于紀放命肆逆滔天竊據萬里靡不潤之以風雨震之以雷霆九伐之道旣敷八法之化自理豈伊博施於民濟斯黔庶固以義洽四海道威八荒者矣至於上天垂象四靈效徵圖讖之文旣明人神之望已改百工歌於朝庶民頌于野億兆抃踊傾佇惟新自非百姓樂推天命攸集豈伊在予所得獨專是用仰祇皇靈俯順羣議敬禪神器授帝位於爾躬大祚告窮天祿永終於戲王其允執其中敬遵典訓副率土之嘉願恢洪業於無窮時膺休祐以答三靈之眷望又璽書曰蓋聞天生蒸民樹之以君帝皇寄世實公四海崇替係於勳德升降存乎其人故有國必亡少年著其數代謝無常聖哲握其



符昔在上世三聖係軌疇咨四獄以弘揖讓惟先王之有作永垂  
範於無窮及劉氏致禪寔堯是法有魏告終亦憲茲典我世祖所  
以撫歸運而順人事乘利見而定天保者也而道不常泰戎夷亂  
華喪我洛京蹙國江表仍邁否運淪沒相因逮于元興遂傾宗祀  
幸賴神武光天大節宏發匡復我社稷重造我國家惟王聖德欽  
明則天光大應期誕載明保王室內紓國難外播宏略誅大憝於  
漢陽通僭盜於沂渚澄氛西岷肅清南越再靜江湘拓定樊沔若  
乃永懷區宇思一聲教王師首路則伊洛澄流稜威峭潼則華嶽  
塞靄僞酋銜璧咸陽卽序雖彝器所銘詩書所詠庸勳之盛莫之  
與二也遂偃武修文誕敷德政八統以馭萬民九職以刑邦國思  
兼三王以施四事故能信著幽顯義感殊方自歷世所賓舟車所  
暨靡不謳歌仁德抃舞來庭朕每敬惟道勳永察符運天之曆數  
實在爾躬是以五緯升度屢示除舊之迹三光協數必昭布新之  
祥圖識禎瑞皎然斯在加以龍顏英特天授殊姿君人之表煥如  
日月傳稱惟天爲大惟堯則之詩云有命自天命此文王夫或躍  
在淵者終饗九五之位勲格天地者必膺大寶之業昔土德告訖  
傳胙于我有晉今曆運改卜永終於茲亦以金德而傳于宋仰四  
代之休義鑒明昏之定期詢于羣公爰逮庶尹咸曰休哉罔違朕  
志今遣使持節兼太保散騎常侍光祿大夫澹兼太尉尚書宣範  
奉皇帝璽綬受終之禮一如唐虞漢魏故事王其允答人神君臨  
萬國時膺靈祉酬于上天之眷命王奉表陳讓晉帝已遜瑯邪王  
第表不獲通於是陳留王度嗣等二百七十人及宋臺羣臣並上  
表勸進上猶不許太史令駱達陳天文符瑞數十條羣臣又固請  
王乃從之



宋書卷二 本紀第二終

晉書卷二

宋書卷三

晉書卷三

本紀第三

武帝下

永初元年夏六月丁卯設壇於南郊卽皇帝位柴燎告天策曰皇  
 帝臣裕敢用玄牡昭告皇天后帝晉帝以卜世告終曆數有歸欽  
 若景運以命于諱夫樹君宰世天下爲公德充帝王樂推攸集越  
 俶唐虞降暨漢魏靡不以上哲格文祖元勳陟帝位故能大拯黔  
 首垂訓無窮晉自東遷四維不振宰輔憑依爲日已久難棘隆安  
 禍成元興遂至帝王遷播宗祀堙滅裕雖地非齊晉衆無一旅仰  
 憤時難俯悼橫流投袂一援則皇祀克復及危而能持顛而能扶  
 姦宄具殲僭僞必滅誠興廢有期否終有數至于大造晉室撥亂  
 濟民因藉時來實尸其重加以殊俗慕義重譯來庭正朔所暨咸



服聲教至乃三靈垂象山川告祥人神協祉歲月茲著是以羣公  
卿士億兆夷人僉曰皇靈降鑒於上晉朝欵誠於下天命不可以  
久淹宸極不可以暫曠遂逼羣議恭茲大禮猥以寡德託於兆民  
之上雖仰畏天威略是小節顧探永懷祇懼若實敬簡元辰升壇  
受禪告類上帝用酬萬國之情克隆天保永祚于有宋惟明靈是  
饗禮畢備法駕幸建康宮臨太極前殿詔曰夫世代迭興承天統  
極雖遭遇異塗因革殊事若乃功濟區宇道振生民興廢所階異  
世一揆朕以寡薄屬當艱運籍否終之期因士民之力用獲拯溺  
匡世撥亂安國寧民業未半古功參曩烈晉氏以多難仍邁曆運  
已移欽若前王憲章令軌用集大命於朕躬惟德匪嗣辭不獲申  
遂祇順三靈饗茲景祚燔柴于南郊受終于文祖猥當與能之期  
爰集樂推之運嘉祚肇開隆慶惟始思俾休嘉惠茲兆庶其大赦

天下改晉元熙二年爲永初元年賜民爵二級鰥寡孤獨不能自  
存者人穀五斛逋租宿債勿復收其有犯鄉論清議賊汙淫盜一  
皆蕩滌洗除與之更始長徒之身特皆原遣亡官失爵禁錮奪勞  
一依舊準封晉帝爲零陵王令食一郡載天子旌旗乘五時副車  
行晉正朔郊祀天地禮樂制度皆用晉典上書不爲表答表勿稱  
詔追尊皇考爲孝穆皇帝皇妣爲穆皇后尊王太后爲皇太后詔  
曰夫微禹之感歎深後昆盛德必祀道隆百世晉氏封爵咸隨運  
改至於德參微管勳濟蒼生愛人懷樹猶或勿剪雖在異代義無  
泯絕降殺之儀一依前典可降始興公封始興縣公廬陵公封柴  
桑縣公各千戶始安公封荔浦縣侯長沙公封醴陵縣侯康樂公  
可卽封縣侯各五百戶以奉晉故丞相王導太傅謝安大將軍溫  
嶠大司馬陶侃車騎將軍謝玄之祀其宣力義熙豫同艱難者一



依本秩無所減降封晉臨川王司馬寶爲西豐縣侯食邑千戶庚午以司空道憐爲太尉封長沙王追封司徒道規爲臨川王尚書僕射徐羨之加鎮軍將軍右衛將軍謝晦爲中領軍宋國領軍檀道濟爲護軍將軍中領軍劉義欣爲青州刺史立南郡公義慶爲臨川王又詔曰夫銘功紀勞有國之要典慎終追舊在心之所隆自大業創基十有七載世路迍邐戎車歲動自東徂西靡有寧日實賴將帥竭心文武效寧內拓外迄用有成威靈遠著寇逆消蕩遂當揖讓之禮猥饗天人之祚念功簡勞無忘鑿寐凡厥誠勤宜同國慶其酬賞復除之科以時論舉戰亡之身厚加復贈乙亥立桂陽公義真爲廬陵王彭城公義隆爲宜都王第四皇子義康爲彭城王丁丑詔曰古之王者巡狩省方躬覽民物搜揚幽隱拯災卹患用能風澤遐被遠至邇安朕以寡闇道謝前哲因受終之

期託兆庶之上鑿昧屬慮思求民瘼才弱事艱若無津濟夕惕永念心馳遐域可遣大使分行四方旌賢舉善問所疾苦其有獄訟虧濫政刑乖愆傷化擾治未允民聽者皆當具以事聞方事之宜無失厥中暢朝廷乃眷之旨宣下民壅隔之情戊寅詔曰百官事殷俸薄祿不代耕雖國儲未豐要令公私周濟諸供納昔減半者可悉復舊六軍見祿粗可不在此例其餘官寮或自本俸素少者亦疇量增之己卯改晉泰始曆爲永初曆秋七月丁亥原放劫賊餘口沒在臺府者諸徙家並聽還本土又運舟材及運船不復下諸郡輸出悉委都水別量臺府所須皆別遣主帥與民和市卽時裨直不復責租民求辨又停廢虜車牛不得以官威假借又以市稅繁苦優量減降從征關洛殞身戰場幽沒不反者贍賜其家己丑陳留王曹虔嗣薨辛卯復置五校三將官增殿中將軍員二十



人餘在員外戊戌後將軍雍州刺史趙倫之進號安北將軍征虜將軍北徐州刺史劉懷慎進號平北將軍征西大將軍開府儀同三司楊盛進號車騎大將軍甲辰鎮西將軍李歆進號征西將軍平西將軍乞佛熾盤進號安西大將軍征東將軍高句驪王高璉進號征東大將軍鎮東將軍百濟王扶餘映進號鎮東大將軍置東宮冗從僕射旅賁中郎將官戊申遷神主於太廟車駕親奉壬子詔曰往者軍國務殷事有權制劫科峻重施之一時今王道惟新政和法簡可一除之還遵舊條反叛淫盜三犯補治士本謂一事三犯終無悛革王者頃多并數眾事合而為三甚違立制之旨普更申明八月戊午西中郎將荊州刺史宜都王諱進號鎮西將軍辛酉開亡叛赦限內首出蠲租布二年先有資狀黃籍猶存者聽復本注諸舊郡縣以北為名者悉除寓立於南者聽以南為號

又制有無故自殘傷者補治士實由政刑煩苛民不堪命可除此條罷青州并兗州戊辰詔曰彭沛下邳三郡首事所基情義繾綣事由情獎古今所同彭城桑梓本鄉加隆攸在優復之制宜同豐沛其沛郡下邳可復租布三十年辛未追謚妃臧氏為敬皇后癸酉立王太子為皇太子乙亥詔曰朕承曆受終猥饗天命荷積善之祚藉士民之力率由令範先后祇嚴宣訓七廟肇建情敬無違加以儲宮備禮皇基彌固國慶家禮爰集旬日豈予一人獨荷茲慶其見刑罪無輕重可悉原赦限百日以今為始先因軍事所發奴僮各還本主若死亡及勲勞破免亦依限還直閏月壬午朔詔曰晉世帝后及藩王諸陵守衛宜便置格其名賢先哲見優前代或立德著節或寧亂庇民墳塋未遠並宜洒掃王者具條以聞丁酉特進左光祿大夫孔季恭加開府儀同三司辛丑詔曰王者處



案雖多所諮詳若衆官命議宜令明審自頃或總稱參詳於文漫略自今有厝意者皆當指名其所見不同依舊繼啟又詔曰諸處冬使或遣或不事役宜省可悉停唯元正大慶不在其例郡縣遣冬使詣州及都督府亦停之九月壬子朔置東宮殿中將軍十人員外二十人壬申置都官尚書冬十月辛卯改晉所用王肅祥禪二十六月儀依鄭玄二十七月而後除十二月辛巳朔車駕臨延賢堂聽訟

二年春正月辛酉車駕祠南郊大赦天下丙寅斷金銀塗以揚州刺史盧陵王義真爲司徒以尚書僕射鎮軍將軍徐羨之爲尚書令揚州刺史丙子南康揭陽蠻反郡縣討破之巳卯禁喪事用銅釘罷會稽郡府二月巳丑車駕幸延賢堂策試諸州郡秀才孝廉揚州秀才顧練豫州秀才殷朗所對稱旨並以爲著作佐郎戊申

制中二千石加公田一項三月乙丑初限荊州府置將不得過二千人吏不得過一萬人州置將不得過五百人吏不得過五千人兵士不在此限夏四月巳卯朔詔曰淫祠惑民費財前典所絕可並下在所除諸房廟其先賢及以勲德立祠者不在此例戊申車駕於華林園聽訟巳亥以左衛將軍王仲德爲冀州刺史五月巳酉置東宮屯騎步兵翊軍三校尉官甲戌車駕又幸華林園聽訟六月壬寅詔曰杖罰雖有舊科然職務殷碎推坐相尋若皆有其實則體所不堪文行而已又非設罰之意可籌量猶爲中否之格車駕又於華林園聽訟甲辰制諸署敕吏四品以下又府署所得輒罰者聽統府寺行四十杖秋七月巳巳地震八月壬辰車駕又於華林園聽訟九月巳丑零陵王薨車駕三朝率百僚舉哀于朝堂一依魏明帝服山陽公故事太尉持節監護葬以晉禮冬十月



丁酉詔曰兵制峻重務在得宜役身死叛輒考傍親流遷彌廣未見其極遂令冠帶之倫淪陷非所宜革以弘泰去其密科自今犯罪克兵合舉戶從役者便付營押領其有戶統及謫止一身者不得復侵濫服親以相連染己亥以涼州胡太師沮渠蒙遜爲鎮軍大將軍開府儀同三司涼州刺史癸卯車駕於延賢堂聽訟以員外散騎常侍應襲爲寧州刺史

三年春正月甲辰朔詔刑罰無輕重悉皆原降壬子以前冀州刺史王仲德爲徐州刺史癸丑以尚書令揚州刺史徐羨之爲司空錄尚書事刺史如故撫軍將軍江州刺史王弘進號衛將軍開府儀同三司太子詹事傅亮爲尚書僕射中領軍謝莊爲領軍將軍乙卯以輔國將軍毛德爲司州刺史乙丑詔曰古之建國教學爲先弘風訓世莫尚於此發蒙啟滯咸必由之故爰自盛王迄于近

代莫不敦崇學藝脩建庠序自昔多故戎馬在郊旂卷舒日不暇給遂令學校荒廢誦蔑聞軍旅日陳俎豆藏器訓誘之風將墜於地後生大懼於牆面故老竊歎於子衿此國風所以永思小雅所以懷古今王略遠屆華域載清仰風之士日月以冀便宜傳延胄子陶獎董蒙選備儒官弘振國學王者考詳舊典以時施行二月丁丑詔曰豫州南臨江潯北接河洛民荒境曠轉輸艱遠撫莅之宜各有其便淮西諸郡可立爲豫州自淮以東爲南豫州以豫州刺史彭城王義康爲南豫州刺史征虜將軍劉粹爲豫州刺史又分荊州十郡還立湘州左衛將軍張紀爲湘州刺史戊寅以徐州之梁還屬豫州三月上不豫太尉長沙王道憐司空徐羨之尚書僕射傅亮領軍將軍謝晦護軍將軍檀道濟並入侍醫藥羣臣請祈禱神祇上不許唯使侍中謝方明以疾告廟而已丁未以



司徒廬陵王義真爲車騎將軍開府儀同三司南豫州刺史上疾  
瘳已未大赦天下時秦雖流戶悉南入梁州庚申送綜絹萬匹荆  
雖州運米委州刺史隨宜賦給辛酉亡命刁彌攻京城得入太尉  
留府司馬陸仲元討斬之夏四月乙亥封仇池公楊威爲武都王  
平南將軍楊撫進號安南將軍丁亥以車騎司馬徐琰爲兗州刺  
史庚寅左光祿大夫開府儀同三司孔季恭薨五月上疾甚召太  
子誠之曰檀道濟雖有幹略而無遠志非如兄詔有難御之氣也  
徐羨之傅亮當無異圖謝晦數從征伐頗識機變若有同異必此  
人也小却可以會稽江州處之又爲手詔曰朝廷不須復有別府  
宰相帶揚州可置甲士千人若大臣中任要宜有爪牙以備不祥  
人者可以臺見隊給之有征討悉配以臺見軍隊行還復舊後世  
若有幼王朝事一委宰相母后不煩臨朝仗旣不許入臺殿門要

重人可詳給班劔癸亥上崩于西殿時六十七秋七月己酉葬丹  
陽建康縣蔣山初寧陵上清簡寡欲嚴整有法度未嘗視珠玉輿  
馬之飾後庭無紈綺絲竹之音寧州嘗獻虎魄枕光色甚麗時將  
北征以虎魄冶金創上大悅命擣碎分付諸將平關中得姚興從  
女有盛寵以之廢事謝晦諫卽時遣出財帛皆在外府內無私藏  
宋臺旣建有司奏東西堂施局脚牀銀塗釘上不許使用直脚牀  
釘用鐵諸王出適遣送不過二十萬無錦繡金玉內外奉禁莫不  
節儉性尤簡易常著連齒木履好出神虎門逍遙左右從者不過  
十餘人時徐羨之住西州嘗幸羨之便步出西掖門羽儀絡驛追  
隨已出西明門矣諸子且問起居入閣脫公服止著裙帽如家人  
之禮孝武大明中壞上所居陰室於其處起玉燭殿與羣臣觀之  
牀頭有土鄣壁上葛燈籠麻繩拂侍中表頴盛稱上儉素之德孝



武不答獨曰田舍翁得此以爲過矣故能光有天下克成大業者  
焉

史臣曰漢氏載祀四百比昨隆周雖復四海橫潰而民繫劉氏懔懔黔首未有遷奉之心魏武直以兵威服衆故能坐移天曆鼎運雖改而民未忘漢及魏室衰孤怨非結下晉藉宰輔之柄因皇族之微世擅重權用基王業至於宋祖受命義越前模晉自社廟南遷祿去王室朝權國命遞歸台輔君雖存主威久謝桓溫雄才蓋世勲高一時移鼎之業已成天人之望將改自斯以後晉道彌昏道子開其禍端元顯成其末釁桓玄藉運乘時加以先父之業因基革命人無異心高祖地非桓文衆無一旅曾不浹旬夷凶剪暴祀晉配天不失舊物誅內清外功格區宇至於鍾石變聲柴天改物民已去晉異於延康之初功實靜亂又殊咸熙之末所以恭皇

高遜殆均釋負若夫樂推所歸謳歌所集魏晉采其名高祖收其實矣盛哉

缺



宋書卷三 本紀第三終

要州生鳳尊  
氏圖印帝甫

宋書卷四

本紀第四

少帝

要州生鳳尊  
氏圖印帝甫

少帝諱義符小字車兵武帝長子也母曰張夫人晉義熙二年生於京口武帝晚無男及帝生甚悅年十歲拜豫章公世子帝有旅力善騎射解音律宋臺建拜宋世子元熙元年進為宋太子武帝受禪立為皇太子永初三年五月癸亥武帝崩是日太子即皇帝位大赦尊皇太后曰太皇太后六月壬申以尚書僕射傅亮為中書監司空徐羨之領軍將軍謝晦及亮輔政戊子太尉長沙王道憐薨秋九月丁未有司奏武皇帝配南郊武敬皇后配北郊冬十一月戊子有星孛於營室十二月庚戌魏軍克滑臺明年春正月己亥朔大赦改元為景平元年文武進位二等辛卯祀南郊虜將



達奚卬破金墉進圍虎牢毛德祖擊虜敗之虜退而復合拓跋木末又遣平安公涉歸寇青州癸卯河南郡失守乙卯有星孛於東壁二月丁丑太皇太后崩沮渠蒙遜土谷渾阿豺並遣使朝貢庚辰爵蒙遜爲大將軍封河西王以阿豺爲安西將軍沙州刺史封澆河公辛未富陽人孫法光反寇山陰會稽太守褚談遣山陰令陸劭討敗之三月壬寅孝懿皇后附葬于興寧陵是月高麗國遣使朝貢甲子豫州刺史劉粹遣軍襲許昌殺虜潁州太守庾龍乙丑虜騎寇高平初虜自河北之敗請修和親及聞高祖崩因復侵擾河洛之地騷然矣夏四月檀道濟北征次臨朐焚虜攻具巳未魏軍克虎牢執司州刺史毛德祖以歸秋七月癸酉尊所生張夫人爲皇太后丁丑以旱詔赦五歲以下罪人冬十月巳未有星孛於氏指尾貫攝提向大角仲月在危季月掃天倉而後滅是歲魏

主拓跋嗣薨子燾立十二月丙寅省寧州之江陽犍爲安上三郡合爲宋昌郡

二年春正月癸巳朔日有蝕之廢南豫州刺史廬陵王義真爲庶人徙新安郡乙未以皇弟義恭爲冠軍將軍南豫州刺史乙巳大風天有五色雲占者以爲有兵高麗國遣使貢獻執政使使者誅義真於新安夏五月江州刺史檀道濟揚州刺史王弘入朝帝居處所爲多過失乙酉皇太后令曰王室不造天禍未悔先帝創業弗永棄世登遐義符長嗣屬當天位不謂窮凶極悖一至於此大行在殯宇內哀惶幸災肆於悖詞喜容表於在感至乃徵召樂府鳩集伶官優倡管絃靡不備奏珍羞甘膳有加平日採擇媵御產子就宮醜然無怍醜聲四達及懿后崩背重加天罰親與左右執紼歌呼推排梓宮抃掌笑謔殿省備聞加復日夜媒狎羣小慢戲



興造千計費用萬端帑藏空虛人力殫盡刑罰苛虐幽囚日增居帝王之位好皂隸之役處萬乘之尊悅厮養之事親執鞭撲毆擊無辜以爲笑樂穿池築觀朝成暮毀徵發工匠疲極兆民遠近歎嗟人神怨怒社稷將墜豈可復嗣守洪業君臨萬邦今廢爲榮陽王一依漢昌邑晉海西故事奉迎鎮西將軍宜都王義隆入纂皇統始徐羨之傅亮將廢帝諷王弘檀道濟求赴國討弘等來朝使中書舍人邢安泰潘盛爲內應是旦道濟謝晦領兵居前羨之等隨後因東掖門開入自雲龍門盛等先戒宿衛莫有禦者時帝於華林園爲列肆親自酤賣又開瀆聚土以象破岡埭與左右引船唱呼以爲歡樂夕游天泉池卽龍舟而寢其朝未興兵士進殺二侍者於帝側傷帝指扶出東閣就收璽紱羣臣拜辭送於東宮遂幽於吳郡是日赦死罪以下太后令奉還璽紱檀道濟入守朝堂

六月癸丑徐羨之等使中書舍人邢安泰弑帝於金昌亭帝有勇力不卽受制突走出昌門追以門關路之致殞時年十九



卷四 本紀第四終

楚山老圃

楚山老圃



